

CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE VILARIÑO DE CONSO PARA A CONSTRUCCIÓN DUNHA PISCINA MUNICIPAL E DE EDIFICACIÓN DE APOIO NA CONTORNA DA PRAIA FLUVIAL DA FACEIRA

O xerente de Turismo de Galicia

DECLARA:

Que esta Axencia Turismo de Galicia formalizou co Concello de Vilariño de Conso o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2026.

Que o instrumento convencional ten por obxecto establecer as bases de colaboración entre a Axencia de Turismo de Galicia e o Concello de Vilariño de Conso para a construción dunha piscina municipal e de edificación de apoio na contorna da praia fluvial da Faceira.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.



Segundo.- O Concello de Vilariño de Conso pretende levar a cabo as obras necesarias para a construción dunha piscina nunha parcela da súa propiedade, onde se sitúa na actualidade o campo de fútbol.

A parcela onde se vai a desenvolver o proxecto, con referencia catastral 0494301PG5609S0001EF, ten uns 37.098 m² e un fronte de vía duns 110m á estrada municipal que comunica os núcleos de Vilariño de Conso e Soutelo. Está situada a uns 400 m do núcleo, no lugar da Faceira, na marxe esquerda do río Conselo.

O vaso da piscina proxectada a nivel construtivo defínese como unha lousa de formigón armado de espesor 35 cm na parte inferior e nos laterais tamén muros de formigón armado.

Proxéctase un acabado de mosaico de gres esmaltado color azul, liso, formado por teselas de 50x50x6mm sobre pezas de malla recibidas con adhesivo cementoso C2 TE con escorregamento reducido, rexuntado con morteiro de xuntas de resinas reactivas RG, sobre recebo de morteiro de cemento con aditivo hidrófugo M-15.

Para proceder á súa impermeabilización utilízase o sistema Pool1120 "REVESTTECH" formado por lámina impermeabilizante flexible tipo EVAC, Pool1120 30 "REVESTTECH", composta dunha dobre folla de poliolefina termoplástica con acetato de vinil etileno, con ambas as caras revestidas de fibras de poliéster non tecidas de 0.8 mm de espesor e 600 g/m².

En canto ós exteriores, proxéctase un solado en perímetro e borde da piscina realizado con pezas regulares de granito de acabado abuxardado sobre capa de 2cm de morteiro de cemento M-10, rexuntadas con leitada de cemento, sobre soleira de formigón H-20/B/20. Ademais, colocarase un valado de peche de madeira no perímetro da piscina.

En canto ás instalacións da piscina, esta conta cun sistema de captación de augas no río Conselo. A continuación, esta auga necesita unha serie de tratamentos, polo que, primeiramente, realizarase un filtrado e bombeo nunha edificación próxima á zona de captación. Seguidamente, esta auga pasa por un tratamento de purificación e un último bombeo para chegar ó vaso da piscina. As augas residuais da piscina levaranse directamente á depuradora municipal que se sitúa no outro extremo da parcela.



Tamén se procede á construción dunha edificación de apoio á piscina, na que se situará o cuarto de socorrismo, un almacén para o mantemento da piscina e dous vestiarios diferenciados por sexos.

Terceiro.- A Estratexia de Turismo de Galicia 2030 ten como misión impulsar a sostibilidade integral, a cal ten como obxectivo a posta en valor de actividades en contornas naturais, contando entre as súas propostas de acción co acondicionamento de áreas lúdicas e de instalacións deportivas, con especial incidencia en áreas rurais nas que o turismo activo e deportivo supón unha oportunidade para diversificar a oferta. Esta adecuación farase mediante a posta en valor de actividades turísticas en contornas naturais. A riqueza natural de Galicia favorece a creación de experiencias de turismo activo, deportivo ou ecoturismo, un modo de viaxar que adoita transcorrer en espazos naturais e en estreito contacto coa natureza.

A Xunta de Galicia entende que é de interese público colaborar para a execución do obxecto antes descrito. Este feito xera unha numerosa chegada de visitantes e turistas que pasan a noite na vila, a carón da Serra do Invernadeiro, parque natural situado entre os ríos Ribeira Grande e Ribeira Pequena, formado polas serras de San Mamede, Queixa, Manzaneda e o Fial das Corzas, con altitudes entre os 1.000-1600 m, espazo que destaca pola súa riqueza faunística, botánica e enorme interese xeomorfolóxico e paisaxístico.

Ademais a construción deste equipamento municipal suporá un motor de revitalización económica para a vila e un imán para atraer visitantes. Para o concello, que xa dispón dunha atractiva oferta turística (Parque natural do Invernadeiro, patrimonio arqueolóxico, rutas BTT, rutas de sendeirismo,...), esta infraestrutura actuará como un complemento perfecto de ocio. Suporá un incentivo para a fidelización do turismo rural, ó dispor os viaxeiros nas proximidades un servizo de ocio máis. E tamén mellora a imaxe de marca do concello, xa que proxecta unha imaxe dun municipio dinámico e acolledor.

Con esta actuación quérese potenciar un espazo do concello, favorecendo o uso e goce do entorno por parte de veciños e visitantes, revalorizando o patrimonio e fomentando un turismo deportivo e familiar como un instrumento de reequilibrio territorial, o que supón a posta en valor turístico da citada infraestrutura.



Que a través deste convenio, outórgase ó Concello de Vilariño de Conso unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

